



Broj: 01,02,03,03/11-05-1-407/22
Sarajevo, 20. 3. 2022.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

KOLEGIJU PREDSTAVNIČKOG DOMA PSBiH

KOLEGIJU DOMA NARODA PSBiH

KOLEGIJU SEKRETARIJATA PSBiH

DOKUMENT			
1-3 -04- 2022			
Uredni broj	Klasifikacijski oznaka	Redni broj	Broj priloga

IZVJEŠTAJ, Berlin, 15 – 18. mart 2022. godine

Predsjedavajući Predstavničkog doma Parlamentarne skupštine Bosne i Hercegovine Denis Zvizdić boravio je 17. i 18. marta u službenoj posjeti Berlinu, gdje se sastao s visokim zvaničnicima Bundestaga Savezne Republike Njemačke.

Predsjedavajući Zvizdić u Berlinu je imao niz sastanaka i razgovora o aktuelnoj političkoj situaciji u Bosni i Hercegovini.

Denis Zvizdić sastao se s predsjedavajućim vanjskopolitičkog odbora Bundestaga Michaelom Rothom. Upoznao ga je s aktuelnom političkom situacijom u zemlji i s višemjesečnom antiustavnom blokadom rada državnih institucija.

Predsjedavajući Zvizdić zahvalio se na snažnom interesu njemačke vlade za stanje na Zapadnom Balkanu, a posebno u Bosni i Hercegovini. Rekao je da je za građane BiH veoma važno da Njemačka stoji uz BiH i da je jasno iskazala opredjeljenje za politiku proširenja Evropske unije.

Tokom sastanka gospodin Zvizdić upoznao je predsjedavajućeg Rotha o tome da je Predstavnički dom PSBiH prošle sedmice usvojio tri ključna zakona s evropskog programa za BiH i izrazio nadu da će to učiniti i Dom naroda kako bi BiH mogla dobiti kandidatski status za članstvo u Evropskoj uniji.

Predsjedavajući Roth rekao je da je destruktivna politika blokade institucija, bojkoti, te politika secesije potpuno neprihvatljiva i Evropskoj uniji i Njemačkoj, te da se s takvim politikama mora prestati.

Razgovarali su i o situaciji u Ukrajini i o refleksijama na Bosnu i Hercegovinu. Saglasili su se o tome da je neophodno zaustaviti ruske namjere destabilizacije Zapadnog Balkana.

Predsjedavajući Zvizdić i Roth razgovarali su i o problemu odlaska mladih ljudi iz BiH. Također, upoznao je Rotha s aktuelnim povećanjem broja vojnika u okviru Misije EUFOR-a u BiH i naglasio da je to pozitivna odluka i poruka, ali da broj vojnika i dalje nije dovoljan i da ga je potrebno dodatno povećati, te stacionirati na ključna područja u BiH, poput Brčko

Distrikta. Gospodin Zvizdić pozvao je Njemačku da se vrati u Misiju EUFOR-a jer bi to bio veliki podstrek za očuvanje teritorijalnog integriteta i suvereniteta BiH.

Predsjedavajući Predstavničkog doma Parlamentarne skupštine BiH Denis Zvizdić sastao se i s poslanicom u Bundestagu Jasminom Hostert.

Upoznao ju je s političkom situacijom u zemlji i rekao da je BiH, uprkos problemima, posvećena evropskoj i NATO perspektivi. Naglasio je da je pristupanje Evropskoj uniji glavni vanjskopolitički prioritet Bosne i Hercegovine.

'U uvjetima velike krize u svijetu izazvane invazijom Rusije na Ukrajinu, za moju zemlju ne postoji alternativa euroatlantskom putu koji smo već davno zacrtali. Ono što je veoma bitno danas jeste tempo kojim ćemo ostvariti ove ciljeve. S obzirom na to da su evropske integracije pokretačka snaga svih pozitivnih reformi u Bosni i Hercegovini, brzina procesa pristupanja Evropskoj uniji je danas važnija nego ikada. Kako sam nebrojeno puta do sada rekao, evropski put Bosne i Hercegovine, ma kako trnovit izgledao, zaista nema alternativu. Prošle sedmice smo usvajanjem tri zakona, koja još treba da odobri Dom naroda, stekli kredibilne uvjete za članstvo u Evropskoj uniji', rekao je tokom susreta predsjedavajući Zvizdić i izrazio zadovoljstvo što BiH u Bundestagu ima iskrene prijatelje.

Poslanica Hostert je rekla da Njemačka ostaje pri stavu da je arhitektura Zapadnog Balkana završena i da naredni period treba raditi na stabiliziranju cjelokupnog stanja u BiH kako bi se zaustavio odlazak mladih i obrazovanih ljudi, kao i da se, u smislu očuvanja demokratskih vrijednosti, trebaju održati opći izbori.

'Budućnost Bosne i Hercegovine je u Evropskoj uniji i ona nema alternativu, ali Evropa mora biti prisutna i aktivna u regionu, a politika otvorenih vrata stalno aktuelizirana', istakao je predsjedavajući Zvizdić.

Održan je sastanak i s poslanikom u Bundestagu Borisom Mijatovićem.

Predsjedavajući Zvizdić istaknuo je da euroatlantske integracije ostaju ključni prioritet Bosne i Hercegovine i da se u realizaciji tih ciljeva očekuje pomoć od Njemačke kao dokazanog prijatelja i istinskog zagovornika evropske budućnosti BiH.

Izrazio je zadovoljstvo što Bosna i Hercegovina ima unutar Bundestaga svoje iskrene prijatelje koji štite teritorijalni integritet i suverenitet BiH i snažno podržavaju integracije i ekonomski razvoj. Rekao je da je Bosna i Hercegovina strateški važna zemlja u regiji i da predstavlja ključ stabilnosti i sigurnosti Zapadnog Balkana.

Predsjedavajući Zvizdić i poslanik Mijatović saglasili su se da je kredibilna evropska perspektiva najbolja potvrda stabilnosti Zapadnog Balkana. Istaknuli su važnost očuvanja mira i stabilnosti, kao i obavezu održavanja općih izbora u smislu očuvanja osnovnih demokratskih vrijednosti.

Takoder, održan je sastanak i s poslanikom u Bundestagu Josipom Juratovićem, koji je istaknuo da je neophodna veća briga Njemačke i Evropske unije za zemlje Zapadnog Balkana.

Juratović je pohvalio usvajanje tri ključna zakona s evropskog programa za BiH koja su potrebna za dobivanje kandidatskog statusa za članstvo u Evropskoj uniji i rekao da će Njemačka pomoći da se ozbiljnije krene ka pretpripravnim pregovorima.

Predsjedavajući Zvizdić i poslanik Juratović saglasili su se da je neophodno zaustaviti odlazak mladih ljudi iz BiH. Naglasili su da je to jedan od najvećih problema s kojim se suočava BiH, a i cijela regija, i da je potrebno najhitnije djelovanje.

Razgovarali su i o jačanju Parlamenta. Juratović je rekao da postoje demokratske snage u regiji i da treba raditi na njihovom osnaživanju uz konkretniju podršku Evropske unije.

Razgovarali su i o održavanju općih izbora i tom prilikom poslanik Juratović je rekao da se izbori na demokratskim principima moraju održati. Istaknuo je kako je neophodno provesti presude Evropskog suda za ljudska prava i da Bosna i Hercegovina samo potpunom jednakošću svih građana može postati dio evropske porodice.

Poslanik Juratović upoznao je predsjedavajućeg Zvizdića o skorom formiranju SPD-ove grupe prijateljstva za Zapadni Balkan, koja će doprinijeti jačanju saradnje u regionu.

Izveštaj odobrio

Predsjedavajući Predstavničkog doma PSBiH


Dr. Denis Zvizdić

Izveštaj pripremila

Dženana Leper

Stručna saradnica za bilateralne odnose

Sektor za međunarodne odnose i protokol



Dostaviti:

- naslovu
- Sektoru za međunarodne odnose i protokol